

SAMOA

Faatulagaina o Aiaiga

**VAEGA I
FAATOMUAGA**

1. Igoa puupuu ma le amataga
2. Faamatalaina o uiga o upu

**VAEGA II
O LE PULEGA O TAALOGA
A LE PASEFIKA I SAUTE**

3. Faaauauina o le Pulega
4. O le Faa-Tama ma le Faa-Tautai o Taaloga
5. Komiti Faatonu o Pulega
6. Isi sui auai o le Pulega
7. Ofisa Sili o Pulega
8. Aufaigaluega ma tagata faigaluega o le Pulega
9. Faatonu o Polokalame
10. Tagata e ofo e galulue fua mo Taaloga
11. Galuega tauave ma malosiaga o le Pulega
12. Faatinoina o malosiaga mo tulaga faanatinati
13. Tuuina atu o malosiaga
14. Faamalumaluga

**VAEGA III
TUPE, LIPOTI MA LE
SUEINA O TUSI**

15. Fuafuaga Autasi
16. Faaputugatupe a le Pulega
17. Aseta a le Pulega
18. Faamatalaga tau tupe a le Pulega
19. Lipoti faaletausagea ma isi lipoti manaomia

**VAEGA IV
PUIPUIGA O AIA TATAU A
VAEGA O FAASALALAUGA
MA FAAILOGA MA
FAAILOILO TAU TAALOGA**

20. E mafai e le Pulega ona faataga faasalalauaga ma faamaumauga o Taaloga
21. Solia o aia tatau a vaega o faasalalauaga
22. Pule faataga e faaaogā ai Faailoga ma Faailoilo tau Taaloga
23. Faaaogāina o Faailoga ma Faailoilo tau Taaloga

24. Faaogāina faasolitulafono o Faailoga ma Faailoilo tau Taaloga
25. Puipuiga o isi meatotino tau le atamai

**VAEGA V
AIA TATAU E
LAGOLAGOINA AI MA AIA
TATAU E FAIA AI IGOA**

26. Maliega mo le lagolagoina o taaloga
27. Sone mo faasalalauga faatosina
28. Aia tatau e faia ai igoa
29. Amio faasolitulafono e foliga mai o se lagolago i taaloga po o se pule faataga

**VAEGA VI
SOLITULAFONO**

30. Faalavelaveina o Taaloga

**VAEGA VII
AIAIGA ESEESE**

31. Faaogāina o tulaga aloaia faaletulafono i totonu ma fafo atu o Samoa
32. Faoa faamalosī o meafaigaluega faasolitulafono
33. Solitulafono a Faalapotopotoga
34. O isi gaioiga ua solia ai lenei Tulafono
35. Aiaiga tau soloaiga ma aiaiga faasaina
36. Faailoaina atu ma le faaaogāina sese o faamatalaga
37. Tulafono Faatonutonu
38. Soloia

2007, Nu. 15

O SE TULAFONO e soloia ai le Tulafono o le Pulega o Taaloga o le 2007 a le Pasefika i Saute 2002, ma faia ai aiaiga mo le toe faatulagaina o le Pulega o Taaloga a le Pasefika i Saute, ma mo faamoemoega e fesootai i ai.

[16 Fepuari 2007]

UA FAIA e le Fono Aoao Faitulafono a Samoa i totonu o le Palemene ua potopoto e faapea:-

VAEGA 1 FAATOMUAGA

1. Igoa puupuu ma le amataga-(1) E mafai ona taua leni Tulafono o le Tulafono o le Pulega o Taaloga a le Pasefika i Saute 2007.

(2) O leni Tulafono e tatau ona amata faamamaluina i le aso e tuuina i ai le maliega a Le Ao o le Malo.

(3) O le Faasilasilaga o le amata faamamaluina o leni Tulafono e tatau ona lomua faasalalau i le gagana Samoa ma le gagana Peretania i totonu o le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o leni Tulafono, ae vagana ai ua manaomia e le mataupu se isi uiga e ese ai -

“Pulega” o lona uiga o le Pulega o Taaloga a le Pasefika i Saute ua faavaeina i lalo o le Tulafono ua soloia ma faaauau ai pea e tusa ai o le fuaiupu 3 o leni Tulafono;

“Taitaifono” o lona uiga o le Minisita ua tofia e avea ma Taitaifono o le Pulega i lalo o le fuaiupu 5(1)(a);

“Faavae” o lona uiga o le Faavae o Taaloga a le Pasefika i Saute;

“Faamasinoga” o lona uiga o le Faamasinoga Sili a Samoa;

“Sui Taitaifono” o lona uiga o le Minisita ua tofia e avea ma Sui Taitaifono o le Pulega i lalo o le fuaiupu 5(1)(b);

“Komiti Faatonu o Pulega” o lona uiga o le Komiti Faatonu o Pulega a le Pulega ua faavaeina i lalo o le fuaiupu 5;

“Taaloga” o lona uiga o Taaloga a le Pasefika i Saute 2007 e faia i Apia, Samoa;

“Vaega o Taaloga” o lona uiga o se vaega po o se gaoioiga ua faia e avea o se vaega o Taaloga, ma ua aofia ai ae le faatapulaaina i:

(a) se faatinoga o se taaloga;

(b) sauniga aloaia e tatala ma tapunia ai;

(c) se moliga fua o lo o tauaveina ai le sulu; ma

(d) so o se sauniga faaleaganuu e fesootai ma Taaloga.

“Faailoga ma Faailoilo tau Taaloga” o lona uiga o so o se upu, fuainumera, igoa, faailoga:

- (a) ua faamaonia e le Komiti Faatonu o Pulega mai lea taimi i lea taimi ma ua lomia faasalalau i totonu o le Savali; ma
- (b) so o se isi lava faailoga po o ata o lo o taua mai i po o lo o faailoa ai Taaloga,
- ma so o se vaega o ia faailoga ma faailoilo.
- “Tagata e ofo e galue fua mo Taaloga” o lona uiga o so o se tagata ua faafaigaluegaina e le Pulega e tusa ai ma le fuaiupu 10;
- “Aia tatau o meatotino tau le atamai” e aofia ai aia tatau uma i meatotino tau le atamai ua aloaia i lalo o tulafono a Samoa;
- “Aia tatau a le vaega o faasalalaua” e aofia ai le aia tatau e lipoti ai, faasalalau, pueina i masini pueleo ma ata, lomia faasalalau, televise (po o le tufatufaina o so o se oloa o so o se vaega o nei gaoioiga) o so o se Vaega o Taaloga o le 2007 a le Pasefika i Saute e ala lea i le mauaina o avanoa faalauaitele i vaega o faasalalaua, e aofia ai ae le faatapulaaina i nusipepa, leitio, televise, faasalalaua i initaneti o ata tifaga, tusi, nusipepa, faamaumauga ma so o se tekonolosi faa-komepiuta;
- “Minisita” o lona uiga o le Minisita o Punaoa Faalenatura, Siosiomaga ma le Vaai Tau;
- “Faatonu o Polokalame” o lona uiga o so o se Faatonu o Polokalame ua tofia e le Komiti Faatonu o Pulega i lalo o le fuaiupu 9;
- “SASNOC” o lona uiga o le Faalapotopotoga o Taaloga a Samoa ma le Komiti Aoao o le Olimepeka lea e avea o le Faalapotopotoga Aoao o Taaloga i totonu o Samoa mo faamoemoega o le Faavae;
- “Faailoga ma Faailoilo a le Fono a Taaloga a le Pasefika i Saute” e aofia ai upu uma, fuainumera, igoa, faailoga, tagavai, ata ma isi faailoga ma faailoilo e faasino i po o lo o faailoa ai le Fono o Taaloga a le Pasefika i Saute, ma so o se vaega o ia faailoga ma faailoilo;
- “Tulafono ua soloia” o lona uiga o le Tulafono o Pulega o Taaloga o le 2007 a le Pasefika i Saute 2002;

VAEGA II
PULEGA O TAALOGA A LE PASEFIKA I SAUTE

3. Faaauauina o le Pulega-(1) E tatau ona faaauau pea le Pulega o Taaloga a le Pasefika i Saute ua faavaeina i lalo o le fuaiupu 3 o le Tulafono ua soloia, ma e tatau ona tuufaatasia ma pulea e tusa ai o aiaiga o lenei Tulafono.

(2) E tatau ona faaauau pea le avea o le Pulega o se faalapotopotoga ua tuufaatasia faaletulafono faatasi ma le faaauauina tumau ma:

- (a) e tatau ona i ai se faamaufaailoga;
- (b) e mafai ona faia ni konekarate;
- (c) e mafai ona faia se moliaga pe e molia foi i lona igoa faale-faalapotopotoga ua tuufaatasia faaletulafono;
- (d) e tatau ona i ai le malosiaga e maua ai, umia ma faamatuu atu meatotino moni ma meatotino tau i le tagata lava ia; ma
- (e) e mafai i se tulaga lautele ona faia gaoioiga uma ia ma mea e tatau mo po o e aliae mai i le faatinoga o ana galuega tauave i lalo o lenei Tulafono po o so o se isi tulafono.

(3) O le faamaufaailoga masani a le Pulega e tatau ona tausia i lalo o le puipuiga a le Ofisa Sili o Pulega, ma e faatoa mafai lava ona faapipiina pe afai o lo o auai ai le:

- (a) Taitaifono po o le Sui Taitaifono; ma
- (b) le Ofisa Sili o Pulega, po o so o se isi lava tagata ua faatagaina e le Komiti Faatonu o Pulega,

o ia lea e tatau ona ia molimau i le faapipiina o le faamaufaailoga masani e ala i se saina tusitusia.

4. O le Faa-Tama ma le Faa-Tautai o Taaloga-(1) O Lana Afioga Mamalu O le Ao o le Malo, Malietoa Tanumafili II e tatau ona avea ma Faa-Tama o le Pulega.

(2) O le Palemia e tatau ona taua “O le Faa-Tautai o Taaloga”.

5. Komiti Faatonu o Pulega-(1) O le Komiti Faatonu o Pulega a le Pulega o i latou ia o:

- (a) le Minisita o Punaoa Faalenatura, Siosiomaga ma le Vaai Tau, o ia lea e tatau ona avea ma Taitaifono o le Pulega; ma
- (b) le Minisita o Aoga, Taaloga ma Aganuu, o ia lea e tatau ona avea ma Sui Taitaifono o le Pulega; ma
- (c) le Peresetene o le SASNOC; ma
- (d) le Failautusi a le SASNOC; ma
- (e) le Ofisa Sili o Pulega; ma
- (f) se sui mai le Matagaluega o Tupe; ma
- (g) le loia faufautua mo le Pulega.

(2) Mo faamoemoega uma e tatau ona galulue faatasi le Komiti Faatonu o Pulega ma le Komiti Faafoe o Taaloga a le Pasefika i Saute ma e mafai ona ia faatino malosiaga uma, matafaioi ma tiute tauave:

- (a) e pei ona aiaia i lenei Tulafono; ma
- (b) ina ia tusa ai ma le Faavae.

(3) E mafai e le Taitaifono mai lea taimi i lea taimi ona tuuina atu uma po o so o se matafaioi o lenei tofi i le Peresetene o le SASNOC, ma e mafai ona fetuunai pe faalēaogā so o sea malosiaga i so o se taimi.

(4) I le noatia ma le fai fuafua i le faafuiaupu (4A), o faaiuga uma a le Komiti Faatonu o Pulega e tatau ona faia i ai se faaiuga e sui auai a itiiti mai e toatolu (3), ma mo so o se faamoemoega e tatau i le Komiti Faatonu o Pulega ona fuafua ana taualumaga.

(4A) O sui auai o lo o taua i parakalafa (1)(f) ma le (g) e le palota i faaiuga a le Komiti Faatonu o Pulega.

(5) E mafai e le Komiti Faatonu o Pulega ona faavae ni komiti e faatinoina so o se galuega tauave talafeagai e ogatasi ma lenei Tulafono ma le Faavae ma o tagata ua tofia i komiti ua faavaeina i lalo o lenei faafuiaupu e mafai ona aofia ai:

- (a) sui o le Pulega;
- (b) afaigaluega a le Pulega;
- (c) tagata e ofo e galulue fua mo Taaloga; ma
- (d) so o se isi tagata e manatu le Komiti Faatonu o Pulega e mafai ona faia sona sao i le galuega a le Pulega.

(6) E mafai ona taitaifono i se Komiti ua faavaeina i lalo o le faafu'aiupu (3) se Faatonu o Polokalame ina ia tusa ai ma so o se tofiga ua faia e le Komiti Faatonu o Pulega.

(7) E tatau ona avea le Failautusi o le Komiti Faatonu o Pulega ma Failautusi tau Pulega i le Minisita o ia lea e tatau:

- (a) ona tausia mataupu ma faamaumauga sao atoatoa o fonotaga ma faaiuga a le Komiti Faatonu o Pulega; ma
- (b) tausia faamaumauga sao atoatoa o faaiuga uma ua faia e so o se sui auai o le Komiti Faatonu o Pulega pe afai ua tuuina atu i lena sui le malosiaga e faia ai faaiuga i lalo o lenei Tulafono po o so o se tuuina atu faaletulafono o malosiaga.

6. Isi sui auai o le Pulega-(1) O isi sui auai o le Pulega e tatau ona aofia ai:

- (a) le Minisita Lagolago o lo o fitoitonu i ai Taaloga a le Pasefika i Saute;
- (b) le Minisita Lagolago e fitoitonu ma Aoga;
- (c) le Ofisa Sili o Pulega o le Matagaluega o Punaoa Faalenatura, Siosiomaga ma le Vaai Tau;
- (d) le Ofisa Sili o Pulega o le Matagaluega o Galuega, Felauaiga ma Atinae Eseeese;
- (e) le Ofisa Sili o Pulega o le Matagaluega o Aoga, Taaloga ma Aganuu;
- (f) le Ofisa Sili o Pulega o le Matagaluega o Tupe;
- (g) le Loia Sili;
- (h) sui e toalua o le Komiti o Pulega o le SASNOC;
- (i) sui e toalua ua filifilia e le Minisita e sui tulaga i aia tau pisinisi;
- (j) se tagata e toatasi ua filifilia e le Minisita e fai ma sui o le Komiti Faatino o le Malae Taalo ma Nofoaga o Taaloga; ma
- (k) se tagata e toatasi e filifilia e le Minisita e fai ma sui o tagata lautele.

(2) O tagata ua filifilia e le Minisita i lalo o le Tulafono ua soloia e fai ma sui o aia ua faamaotiina i totonu o parakalafa (f)-(i) o le faafuaiupu (1) e tatau ona faaaauau pea ona avea ma sui auai o le Pulega seia vagana ua aveesea pe suia e le Minisita.

(3) E tatau i isi sui auai o le Pulega ona:

(a) fono pe a valaauiina e le Komiti Faatonu o Pulega ina ia faia faapea; ma

(b) faatino isi galuega tauave, matafaioi, tiute tauave ma malosiaga ua faaeeina ia i latou, mai lea taimi i lea taimi, e le Komiti Faatonu o Pulega.

(4) E mafai e sui auai ua taua i totonu o le faafuaiupu (1)(a)-(d) ona tofia e avea ma o latou sui, se tagata sinia o la latou Matagaluega po o le Ofisa ina ia auai i so o se fonotaga lea e auai atu i ai le sui auai ma ia faatinoina so o se galuega tauave, matafaioi, tiute tauave po o malosiaga ia e tauaveina e lena sui.

(5) E mafai e le Komiti Faatonu o Pulega ona tofia e avea ma sui isi tagata, mai lea taimi i lea taimi ina ia oo atu ma auai i fonotaga a le Pulega, peitai e le tatau ona i ai se malosiaga i ia tagata e palota ai i so o se mataupu.

7. Ofisa Sili o Pulega-(1) E tatau ona i ai se Ofisa Sili o Pulega a le Pulega.

(2) O le Ofisa Sili o Pulega a le Pulega o lo o i ai i le taimi e amata faamamaluina ai lenei Tulafono, e tatau ona faaaauau pea ona avea o le Ofisa Sili o Pulega a le Pulega.

(3) Afai e tulai mai se avanoa i le tofi o le Ofisa Sili o Pulega, e mafai e le Komiti Faatonu o Pulega ona tofia se tagata e galue i lea tulaga tofi.

(4) E mafai e le Komiti Faatonu o Pulega ona tofia so o se tagata ofisa a le Pulega e galue o le Ofisa Sili o Pulega i so o se vaitaimi e toesea ai le Ofisa Sili o Pulega.

(5) O le Ofisa Sili o Pulega e tatau ona tali atu i le Komiti Faatonu o Pulega mo le pulea atoatoa ma lelei o le Pulega, ma e tatau ona ia te ia le malosiaga e:

(a) faia ai so o se mea ua faaee atu ia te ia i lenei Tulafono, po o ua faatagaina e le Komiti Faatonu o Pulega po o le Pulega;

- (b) faatino so o se galuega tauave po o malosiaga ua faaee atu ia te ia i lalo o le fuaiupu 13;
- (c) faataunuu malosiaga mo tulaga faanatinati ua aiaia i le fuaiupu 12;
- (d) tuuina atu faatonuga i le aufaigaluega o le Pulega, o Faatonu o Polokalame ma tagata e ofo e galulue fua mo Taaloga.

8. Aufaigaluega ma tagata faigaluega o le Pulega-(1) E mafai e le Komiti Faatonu o Pulega ona tofia se aufaigaluega o le Pulega e pei ona manatu o ia ua talafeagai ai mo le faatinoina lelei o galuega a le Pulega.

(2) O le aufaigaluega ua faafaigaluegaina e le Pulega i le amata faamamaluina o lenei Tulafono e tatau ona faaaau pea ona avea o le aufaigaluega a le Pulega e faapei ai sa tofia i latou i lalo o lenei Tulafono.

(3) E mafai e le Komiti Faatonu o Pulega ona tofia se tagata ofisa e toatasi (1) o le Pulega po o le sili atu ina ia avea ma Sui Ofisa Sili o Pulega a le Pulega.

(4) E tatau i le aufaigaluega uma a le Pulega ona galulue e tusa ai o le faatonuga ma le faafoega a le Ofisa Sili o Pulega ma ia tusa ai ma so o se pule faataga ua faia i lalo o lenei Tulafono.

(5) E mafai ona tofia tagata faigaluega mai isi Matagaluega, lala sooupu a le Malo ma so o se isi faalapotopotoga e galulue i le Pulega, ma e tatau ona faia ia tofiga e tusa ai ma tuutuuga ma aiaiga ua malilie faatasi i ai le Pulega ma le tagata e ona le galuega lea e galue ai le tagata faigaluega ua tofia.

(6) E mafai e le Komiti Faatonu o Pulega ona faamaonia le aofia ai o tagata faufautua ma isi tagata ina ia faia so o se galuega ma faatino so o se mataupu e manaomia e le Pulega.

9. Faatonu o Polokalame-(1) E mafai e le Komiti Faatonu o Pulega, mai lea taimi i lea taimi, ona faamaonia ni tagata e avea o Faatonu o Polokalame, o i latou ia e tatau ona nafa ma le faatinoina ma le vaavaaia o so o se itu maoti o sauniuniga po o le faafoeina o Taaloga, e pei ona fuafuaina e le Komiti Faatonu o Pulega.

(2) E mafai ona avea Faatonu o Polokalame:

- (a) o se sui auai o le Pulega;
- (b) o se tagata faigaluega tumau o le Pulega; po o
- (c) se tagata e ofo e galue fua mo Taaloga.

(3) E tatau ona nafa le Ofisa Sili o Pulega ma le pulea o galuega a Faatonu o Polokalame ma le tuuina atu o faatonuga talafeagai ia i latou ina ia latou faataunuu faaiuga a le Komiti Faatonu o Pulega.

(4) O Faatonu taitoatasi uma o Polokalame e tatau ona totogiina mai faaputugatupe a le Matagaluega, o ia totogi ma alauni e tatau ona totogiina e pei ona faamaonia e le Kapeneta.

10. O tagata e ofo e galulue fua mo Taaloga-(1) E mafai e le Pulega ona faafaigaluega tagata e ofo e galulue fua mai tagata lautele ina ia faatino so o se tiute tauave ua faailoaina mai e pei ona talafeagai ai mo le faafoega saogalemu ma sologa lelei o Taaloga.

(2) E le tatau ona taua tagata e ofo e galulue fua mo Taaloga o ni tagata faigaluega o le Pulega peitai e tatau ona noatia i latou i faatonuga ua tuuina atu e:

- (a) le Ofisa Sili o Pulega;
- (b) se Faatonu o Polokalame; ma
- (c) so o se isi lava sui o le aufaigaluega a le Pulega.

11. Galuega tauave ma Malosiaga o le Pulega-(1) O faamoemoega ma galuega tauave a le Pulega o le:

- (a) sauniuni mo ma pulea Taaloga o le 2007 a le Pasefika i Saute i Samoa;
- (b) atiae ma saunia nofoaga mo le atinae o taaloga i totonu o Samoa, e avea ma sui o Samoa i Taaloga ma le aoaoina o tagata taalo;
- (c) faia laasaga uma talafeagai ma faatino fuafuaga uma talafeagai ina ia mautinoa le saogalemu ma le lelei faafoe o Taaloga, e aofia ai fuafuaga –
 - (i) ina ia faamautu le puipuigamalu ma le saogalemu o tagata ofisa, tagata taalo ma tagata matamata i Taaloga;
 - (ii) mo le puipuigamalu ma le faagaioia saogalemu o nofoaga ma fale taalo; ma

(iii) faamautu le atoatoa o le auai o tagata lautele i Taaloga, ma faaitiitia ai foi aafiaga leaga e ono tulai mai i tagata lautele i sea taaloga; ma

(d) ia faamautu le pulea ma le faafoeina atoatoa o nofoaga ma fale ua fausia mo Taaloga ma ua faapea ona faia fuafuaga uma ina ia tusa ai ma lenei Tulafono mo le faaaogāina tatau ma le pulea o nofoaga ma fale i le vaitaimi e uma ai Taaloga.

(2) I le noatia ma le fai fuafua i aiaiga o lenei Tulafono, e mafai ona faatino malosiaga o le Pulega e po o i lalo o le faatonuga a le Komiti Faatonu o Pulega, ma e aofia ai le malosiaga e:

(a) saili ai, faatau mai, pulea ma faaaogā vaegatupe ina ia faaaogā i faamoemoega ua taua i le faafuaiupu (1);

(b) auai i konekarate faapisinisi ma faatulagaga e pei ona aiaia i lenei Tulafono ma e talafeagai mo faamoemoega ma galuega tauave a le Pulega;

(c) fausia, faafou, tausia, pulea ma faafoe nofoaga ma fale taalo mo le faafoeina ma le faataunuuina o Taaloga;

(d) maua mai meatotino, meafaigaluega, oloa ma isi oloa talafeagai ina ia lelei le tapenaga mo ma le pulea o Taaloga;

(e) auai ai i fuafuaga faakonekarate ma isi fuafuaga faatasi ma isi matagaluega ma lala sooupu a le malo, ma kamupani tumaoti, faalapotopotoga ma tagata, mo le pulea saogalemu ma le faafoega lelei o Taaloga;

(f) faafaigaluegaina o tagata faigaluega talafeagai ma auai atu i konekarate mo galuega talafeagai; ma

(g) faia o so o se isi gaioiga i se isi tulaga e ese ai e pei ona ogatasi ai ma aiaiga o lenei Tulafono ma so o se isi lava Tulafono o lo o faaaogāina ina ia ausia ai faamoemoega o le Pulega.

(3) E tatau ona i ai i le Komiti Faatonu o Pulega le matafaioi e faia ai fuafuaga lelei mo le:

- (a) faamaeaina o mataupu a le Pulega ia e talafeagai i le faafoeina o Taaloga;
- (b) faamamaina pe a maea Taaloga ma faamautu e faapea ua faaiuina lelei le galuega a le Pulega e faasino i le faafoeina o Taaloga;
- (c) pulea lelei ma atoatoa mo le faaaogāina o nofoaga ma fale taalo sa fausia mo faamoemoega o Taaloga ma faamautu e faapea ua faateleina le faaaogāina lelei ma le mauaina o faamanuiaga mai nei nofoaga ma fale taalo mo tagata o Samoa ma le Pasefika i Saute; ma
- (d) le faatinoina o so o se isi polokalame, matafaioi, tiute tauave po o malosiaiga ua faaee atu e le Kapeneta i le Pulega ina ua maea Taaloga, po o e ao ona faia pe faataunuu i le maea o Taaloga.

12. Faatinoina o malosiaiga mo tulaga faanatinati-(1) E ese mai i aiaiga o lenei Tulafono po o so o se isi Tulafono e mafai e le Taitaifono po o le Ofisa Sili o Pulega ona faia so o se gaioioiga e talafeagai i le:

- (a) aiaia ai mo le saogalemu o tagata ofisa o Taaloga ma le au taalo po o mo le malupuipua o nofoaga ma fale o Taaloga;
 - (b) faamautu o le faafoeina lelei ma saogalemu o so o se vaega tau Taaloga; ma
 - (c) fafaga, talimalo, felauai po o ua aiaia ai i se isi faiga e ese ai mo manaoga o tagata ofisa o Taaloga ma tagata taalo.
- (2) I le faataunuuina o se malosiaiga i lalo o le faafuaiupu (1) e mafai e le Taitaifono po o le Ofisa Sili o Pulega ona:
- (a) faatauina mai so o se meataumafa talafeagai, meafaigaluega po o auaunaga;
 - (b) faatulaga mo so o se isi lala sooupu a le Malo po o pulega ina ia tuuina atu so o se fesoasoani po o se lagolago talafeagai;
 - (c) faia so o se isi lava mea ua talafeagai mo le faafoeina saogalemu ma atoatoa o Taaloga ma mo le saogalemu, malupuipua ma le tausiga lelei o tagata uma i Taaloga.

(3) I se taimi vave lava e mafai ai ina ua tuanai ai le faatinoina o se malosiaga i lalo o lenei fuaiupu:

(a) e tatau i le Taitaifono ona fautuaina le Komiti Faatonu o Pulega e uiga i le gaoioiga ua ia faia po o ua faia e le Ofisa Sili o Pulega;

(b) e tatau i le Ofisa Sili o Pulega ona fautuaina le Taitaifono e uiga i le gaoioiga ua ia faia.

(4) O gaoioiga uma ua faia i lalo o lenei fuaiupu e ao ona faailoa atu e le Taitaifono i le Komiti Faatonu o Pulega mo lona faamaoniga.

13. Tuuina atu o malosiaga-(1) E mafai e le Komiti Faatonu o Pulega ona tuuina atu i le Ofisa Sili o Pulega, se Faatonu o Polokalame po o so o se isi tagata talafeagai so o se galuega tauave, matafaioi, tiute tauave po o malosiaga ina ia faia e tusa ai o so o se manaoga po o aiaiga ua faaeeina atu i ai e le Komiti Faatonu o Pulega.

(2) E mafai e le Ofisa Sili o Pulega ona tuuina atu i so o se Faatonu o se Polokalame po o se tagata ofisa o le Pulega so o sana galuega tauave, matafaioi, tiute tauave po o malosiaga ina ia faia e tusa ai o so o se manaoga po o aiaiga ua faaeeina atu i ai e le Ofisa Sili o Pulega.

(3) E ui lava i so o se malosiaga ua tuuina atu i lalo o lenei fuaiupu, e mafai e le Komiti Faatonu o Pulega ma le Ofisa Sili o Pulega, i le a lava le tulaga e i ai, ona faaauau le faatinoga po o le faataunuaina uma o so o se galuega tauave, matafaioi, tiute tauave po o malosiaga ua uma ona tuuina atu.

14. Faamalumaluga ma puipuiga mausali-(1) E le tatau ona noatia sui auai uma ma le aufaigaluega a le Pulega, ma Faatonu uma o Polokalame ma tagata e ofo e galulue fua mo Taaloga mo so o se gaoioiga po o se mea ua le faia na aliae mai i le agaga lelei a o faatino, po o sa faamoemoe e faatino malosiaga, galuega tauave, tiute tauave ma matafaioi i lalo o lenei Tulafono po o so o se isi tulafono o lo o faaaogāina i le Pulega.

VAEGA III
TUPE, LIPOTI MA LE SUEINA O TUSI

15. Fuafuaga Autasi-(1) E tatau i le Pulega ona tuuina atu se fuafuaga autasi mo le faamaoniga a le Kapeneta i le tolu (3) masina a o lumanai ai le faaiuga o tausaga faaletupe taitasi.

(2) O fuafuaga autasi taitasi ua tuuina atu i lalo o le faafuaiupu (1) e tatau ona lipotia ai:

- (a) gaoioiga a le Pulega ua faia i totonu o le tausaga e pei ona lipotia, ma sini o ia gaoioiga;
- (b) fuafuaga faataatitia, faiga faavae ma tala o tupe mo le ausiaina o sini ma le faatinoina o gaoioiga;
- (c) o sini autu ma taiala faataatitia mo le iloiloaina o faatinoga a le Pulega e ausia ai ana sini ma le faatinoga o ana gaoioiga; ma
- (d) so o se isi mataupu po o ni mea ua manaomia e le Komiti Faatonu a le Kapeneta.

16. Faaputugatupe a le Pulega-(1) O faaputugatupe a le Pulega e tatau ona aofia ai tupe e tologiina i le Pulega:

- (a) mai tupe ua faatatauina e le Palemene;
- (b) i lalo o maliega e faasino i aia tatau o vaega o faasalalauga ua faaee atu i le Pulega i lalo o lenei Tulafono;
- (c) mo le faaaogāina o aia tatau o meatotino tau le atamai ua faaee atu i le Pulega i lalo o lenei Tulafono;
- (d) mai le faatauina atu o oloa ma le faatinoina o isi gaoioiga tau maketi ma le faalauiloaina;
- (e) mai i faalapotopotoga o lo o lagolagoina Taaloga e tusa ai ma fuafuaga o le lagolago ua faamaonia e le Komiti Faatonu o Pulega;
- (f) mai le tologi faalisi po o le lisiina o aseta a le Pulega;
- (g) e avea ma foai po o foai faameaalofa mai so o se alaoa; ma
- (h) mai so o se isi alaoa faalettulafono lea e ogatasi ma galuega tauave ma malosiaga o le Pulega i lalo o lenei Tulafono.

(2) E tatau i le Pulega ona tausia se faamaumauga o foai uma ma lagolago ua tuuina atu e ala i oloa, meafaigaluega, oloa eseese ma auunaga.

17. Aseta a le Pulega-(1) O le umiaina o nofoaga ma fale uma ua fausia e le Pulega i luga o eleele o le Malo mo faamoemoega o Taaloga e tatau ona faaee atu i le Pulega, ma e tatau ona aloaia le faamauina o le umiaina e aunoa ma le manaoga mo so o se isi taulumaga faaletulafono.

(2) O aia tatau o le umiaina ma le faaaogāina o nofoaga ma fale ua fausiaina e le Pulega i luga o eleele o isi faalapotopotoga a le Malo po o faalapotopotoga tumaoti e tatau ona fuafuaina e ala i feutagaiga i le va o le Pulega ma faalapotopotoga talafeagai, ma afai o le eleele e umia e se faalapotopotoga umia a le Malo o le faaliliuina atu o le umia ma isi aia tatau e tatau ona tusa ai ma so o se faatonuga ua tuuina atu e le Kapeneta.

(3) E mafai e le Pulega, i fonotaga a sui auai o le Komiti Faatonu o Pulega ma isi sui auai o le Pulega ona, faamaonia le lisiina atu o so o se asetalea ua faaaogā i ai le faafuuiupu (1) i so o se sosaiete ua faamauina po o se faalapotopotoga talafeagai mo so o se faaaogāina lea e mafai ona manuia ai tagata lautele, ma i luga o ia tuutuuga ma aiaiga e pei ona faamaonia e le Pulega.

18. Faamatalaga tau tupe a le Pulega-(1) E tatau i le Pulega ona faaauau pea le tausia o faamatalaga tau tupe ma faamaumauga talafeagai o gaoioiga faapisinisi ma mataupu a le Pulega.

(2) E tatau ona avea ma matafaioi a le Ofisa Sili o Pulega le faamautu e faapea:

- (a) o faaputugatupe uma na totogi faasaofaga ua maua e le Pulega ua faamauina mo le tali atu i faamatalaga tau tupe;
- (b) o tupe totogi uma ua faia e le Pulega o lo o sao le faia ina ia tusa ai ma aiaiga o lenei Tulafono ma taulumaga tau tupe ua faatagaina a le Pulega;

- (c) ua i ai faamaumauga lava saunia ma pulega atoatoa mo le puleaina o meatotino ma nofoaga o le Pulega; ma
 - (d) o lo o atoatoa le faafoeina o noataga faatupulaia e le Pulega.
- (3) E tatau i le Pulega ona saunia faamatalaga tau tupe a itiiti mai o tausaga taitasi lea e tatau ona:
- (a) faaalua ai le tulaga sagatonu ma gaoioiga tau tupe faapea le tulaga tau tupe o le Pulega;
 - (b) tusa ai ma faiga masani o lo o faaogāina i le malo; ma
 - (c) tuufaatasia ai faaletulafono so o se manaoga faapitoa po o auiliiliga e manaomia e le Failautusi o Tupe.

19. Lipoti faaletausaga ma isi lipoti manaomia-(1) E tatau ona saunia e le Pulega se Lipoti Faaletausaga i tausaga taitasi ma tuuina atu le Lipoti Faaletausaga i le Kapeneta mo le faamaonia.

(2) O Lipoti Faaletausaga taitasi ua faamaonia e tatau ona faataatia i luga o le laulau a fono a le Palemene e le Minisita.

(3) E tatau i le Komiti Faatonu o Pulega ona saunia ma tuuina atu so o se isi lipoti lea e mafai ona manaomia mai lea taimi i lea taimi e le Kapeneta.

(4) E tatau i le Ofisa Sili o Pulega ona saunia ma tuuina atu so o se isi lipoti lea e mafai ona manaomia mai lea taimi i lea taimi e le Taitaifono, Sui Taitaifono, Komiti Faatonu o Pulega po o le Pulega.

**VAEGA IV
PUIPUIGA O AIA TATAU A VAEGA O
FAASALALAUAGA MA FAAILOGA MA FAAILOILO
TAU TAALOGA**

20. E mafai e le Pulega ona faataga faasalalauga ma faamaumauga o Taaloga-(1) E ui lava i aiaiga o so o se isi tulafono, o le Pulega e umia aia tatau uma tau faasalalauga i Taaloga.

(2) E mafai e le Komiti Faatonu o Pulega ona faatagaina se tagata po o tagata ina ia:

- (a) faasalalau, faasalalau i televise po o le faasalalau e ala i so o se faiga o se leo po o se ata o so o se Vaega o Taaloga; ma
- (b) pueina so o se leo po o so o se ata tifaga, faasalalau i le televise, ata vito po o faamaumauga ma so o se tekonolosi e faaogāina ai fuainumera o ata gaoioi o se vaega o taaloga.

(2) So o se faatagaga i lalo o lenei fuaiupu e ao ona faia i se faiga tusitusia ma e mafai ona noatia ma fai fuafua i so o se aiaiga po o tuutuuga ua faaee atu e le Komiti Faatonu o Pulega.

(3) So o se faatagaga ua tuuina atu i lalo o le Tulafono ua soloia e faasino i so o se mataupu ua taua i lenei fuaiupu e tatau ona aloaia e faapei ai na tuuina atu i lalo o lenei fuaiupu.

21. Solia o aia tatau a vaega o faasalalauga-(1) So o se tagata o ia lea:

- (a) ua faasalalauina, faasalalau i le televise po o le auina atu e ala i so o se auala so o se leo po o ata o se Vaega o Taaloga e aunoa ma se faatagaga ua tuuina atu i lalo o lenei fuaiupu 20;
- (b) ua pueina faamaumauga o leo po o so o se ata tifaga, televise, ata vito po o faamaumauga o ata gaoioi po o so o se Vaega o Taaloga e aunoa ma se faatagaga na tuuina atu i lalo o le fuaiupu 20;
- (c) ua solia po o ua faalavelaveina i se isi faiga e ese ai aia tatau a vaega o faasalalauga a le Pulega;
- (d) ua fesoasoani pe lagolagoina se isi tagata ina ia faia se solitulafono i lalo o lenei fuaiupu; po o
- (e) ua fautuaina pe usui se isi tagata e faia se solitulafono i lalo o lenei fuaiupu,

ua faia se solitulafono ma e tatau ona noatia i luga o se moliaga ua faamaonia faaetulafono –

(i) afai o le tagata o se tagata e toatasi, i se sala tupe e le silia le 1000 iunite tau faasalaga po o le nofosala i le falepuipui mo se vaitaimi e le silia le tausaga e tasi (1), po o faasalaga uma e lua (2); po o

(ii) afai o le tagata o se kamupani, i se sala tupe e le silia le 5000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua (2).

22. Pule faataga e faaaogā ai Faailoga ma Faailoilo Tau Taaloga-(1) E mafai e le Komiti Faatonu o Pulega ona faatagaina se tagata po o tagata ina ia faaaogāina Faailoga ma Faailoilo Tau Taaloga ma le Faailoga ma Faailoilo a le Fono i le noatia ma le fai fuafua i so o se aiaiga po o tuutuuga e uiga i tupe todogi po o isi tupe ia e faaaogāina e le Komiti Faatonu o Pulega i isi faiga e ese ai.

(2) O se faatagaga ua tuuina atu i lalo o le faafuaiupu (1) e tatau ona faia i se faiga tusinga.

23. Faaaogāina o Faailoga ma Faailoilo Tau Taaloga-(1) I le noatia ma le fai fuafua i le faafuaiupu (2), o le faaaogāina o Faailoga ma Faailoilo Tau Taaloga e aunoa ma le faatagaga aloaia i lalo o le fuaiupu 22 e mafai ona faia e:

(a) tagata taalo, tagata ofisa ma au taalo o lo o tausinio i Taaloga;

(b) ala i fesootaiga aloaia a le SASNOC, laei aloaia ma meatotino;

(c) tagata o lo o lipotia Vaega o Taaloga pe afai o le faaaogāina ua tusa ai ma lea lipoti; ma

(d) tagata o lo o faaaogāina ma le loto lelei mo faamoemoega o aoaoga, toe iloilo ina po o aoga.

(2) E le mafai ona talosagaina e se tagata se aia tatau e faaaogāina ai i lalo o le faafuaiupu (1) pe afai o lo o ia faaaogāina Faailoga ma Faailoilo Tau Taaloga:

(a) mo so o se faamoemoega tau pisinisi;

- (b) mo se faamoemoega e uunaia ai, faasalalauina ai faapisinisi, faamaketi, mo le maua ai o tau faapisinisi pe leai foi;
- (c) e solia ai le fuaiupu 24.

24. Faaaogāina faasolitulafono o Faailoga ma Faailoilo Tau Taaloga – So o se tagata o ia lea o lo o faaaogāina le Faailoga ma Faailoilo Tau Taaloga, po o so o se Faailoga ma Faailoilo Tau Taaloga e ono faaseseina ai e avea ma Faailoga ma Faailoilo Tau Taaloga, mo:

- (a) so o se faamoemoega faapisinisi e aunoa ma se faatagaga i lalo o lenei Vaega;
- (b) so o se faamoemoega e faalauiloa ai, faasalalauina faapisinisi po o le faamaketi, tusa lava pe mo tau faapisinisi pe leai foi, e aunoa ma se faatagaga i lalo o lenei Vaega,

ua faia se solitulafono ma e tatau ona noatia i luga o se moliaga ua faamaonia faaetulafono –

(i) pe afai o le tagata o se tagata e toatasi, i se sala tupe e le silia le 1000 iunite tau faasalaga po o le nofosala i le falepuipui mo se vaitaimi e le silia le tasi (1) le tausaga, po o faasalaga uma e lua; po o

(ii) afai o le tagata o se kamupani, i se sala tupe e le silia le 5000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua.

25. Puipuiga o isi meatotino tau le atamai-(1) E faaopopo atu i aia tatau a vaega o faasalalauina ma aia tatau i Faailoga ma Faailoilo Tau Taaloga ua tuuina atu i le Pulega i lalo o lenei Vaega, o isi uma aia tatau i meatotino tau le atamai ua tulai mai i le tapenaga a le Pulega mo Taaloga e tusa ai ma lenei Tulafono e tatau ona tuuina atu i le Pulega.

(2) So o se tagata o ia lea ua solia aia tatau a le Pulega e uiga i isi aia tatau i meatotino tau le atamai ua tuuina atu i ai i lalo o lenei fuaiupu ua faia se solitulafono ma e tatau ona noatia i luga o se moliaga ua faamaonia faaetulafono –

(i) pe afai o le tagata o se tagata e toatasi, i se sala tupe e le silia le 1000 iunite tau faasalaga po o le nofosala i le falepuipui mo se vaitaimi e le silia le tasi (1) le tausaga, po o faasalaga uma e lua (2); po o

(ii) pe afai o le tagata o se kamupani, i se sala tupe e le silia le 5000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua (2).

(3) O aia tatau a le Pulega e faamalosia ai ana aia tatau i isi meatotino tau le atamai i lalo o lenei Tulafono e faaopoopo atu i so o se isi aia tatau faaletulafono lea e mafai e le Pulega ona faamalosia i lalo o so o se isi tulafono.

VAEGA V AIA TATAU E LAGOLAGOINA AI MA AIA TATAU E FAIA AI IGOA

26. Maliega mo le lagolagoina o taaloga-(1) E mafai e le Komiti Faatonu o Pulega ona faamaonia so o se faatulagaga mo le tuuina atu o tulaga aloaia e lagolago ai taaloga i kamupani ma tagata o lo o faatupeina po o lagolago i le faafoeina ma le pulega o Taaloga.

(2) O faatulagaga ua faia i lalo o lenei fuaiupu e mafai ona faatagaina ai le faaaogāina e faalapotopotoga e lagolagoina taaloga o so o se Faailoga ma Faailoilo Tau Taaloga ma le faaaogāina o so o se meatotino tau le atamai e umia e le Pulega.

(3) So o se faamaoniga ua tuuina atu i lalo o le Tulafono ua soloia lea e faasino i so o se mataupu ua taua i totonu o lenei fuaiupu e tatau ona aloaia e faapei ai na tuuina atu i lalo o lenei fuaiupu.

27. Sone mo faasalalauga faatosina-(1) O Tulafono faatonutonu ua faia i lalo o lenei Tulafono e mafai ona faatino ai faatulagaga ia e tuuina atu ai le malosiaga i le Pulega e filifilia ai nofoaga maoti i totonu o Samoa ina ia avea ma nofoaga faapitoa mo faasalalauga mo i latou e lagolagoina Taaloga, ma e mafai i tulafono faatonutonu ona:

- (a) faaalua manino ai nofoaga ia e noatia ma fai fuafua i sone faapitoa tau faasalalauga faatosina;
- (b) fuafua le vaitaimi e tatau ona faaaogāina ai faatulagaga tau faasalalauga faatosina;
- (c) faatagaina le aveesea ma le toe suia o faatulagaga tau faasalalauga faatosina o lo o i ai nei, ma totogi o tau e faasino i ia gaoioiga;
- (d) faatonuina solitulafono mo le solia o faatulagaga patino mo faasalalauga faatosina; ma
- (e) faia so o se isi aiaiga talafeagai mo le faatinoina o faatulagaga patino i faasalalauga faatosina i sone ua faaalua manino mai.

(2) E tatau i Matagaluega uma ma lala sooupu ia e i ai matafaioi faaletulafono e faasino i le faatonutonuina o faasalalauga ma faatulagaga tau faasalalauga ona faia gaoioiga uma talafeagai e faamalosi ai faatulagaga o aia tatau tau faasalalauga ua faia i lalo o lenei fuaiupu.

28. Aia tatau e faia ai igoa-(1) E mafai e le Pulega ona faamaonia aia tatau e faia ai igoa mo so o se nofoaga po o fale ia o le a faafoeina ai Taaloga.

(2) O maliega mo le lagolagoina o taaloga ua faia i lalo o le fuaiupu 26 e mafai ona aofia ai le tuuina atu o aia tatau e faia ai igoa i so o se nofoaga po o fale ia o le a faafoeina ai Vaega o Taaloga ma o ia aia tatau e mafai ona:

- (a) faaaogā mo le umi e faia ai Taaloga, po o so o se vaitaimi faaopopo ua faatagaina e le Pulega;
- (b) faatagaina ai le fausia ma le faalauiloaina o so o se faailoga po o fausaga ua malilie i ai le Komiti Faatonu o Pulega; ma
- (c) tuuina atu ai tapulaa i so o se isi lava faasalalauga faatosina i nofoaga o lo o faaaogāina i taaloga po o fale.

29. Amio faasolitulafono e foliga mai o se lagolago i taaloga po o se pule faataga-(1) So o se tagata o ia lea o lo o auai i so o se amioga lea e foliga mai po o e i ai le talitonuga ua foliga mai ai e faapea:

- (a) ua i ai i le tagata se faamaoniga, fesootaiga po o le aofia ai i Taaloga po o le Pulega, po o se lagolago aloaia o Taaloga, lea e lē o i le tagata e tusa ai ma lenei Tulafono;
 - (b) o lo o i ai i so o se oloa po o auunaga, po o o lo o aofia ai, i so o se auala faatasi ma se faamaoniga, fesootaiga po o le aofia ai i Taaloga po o le Pulega, po o se lagolago aloaia o Taaloga, lea e le o umia e le tagata e ona, tagata e faatauina atu, tagata e faia po o le tagata e tuuina atu oloa po o auunaga e tusa ai ma lenei Tulafono,
- ua ia faia se solitulafono ma e tataua ona noatia i luga o se moliaga ua faamaonia faaetulafono –

(i) pe afai o le tagata o se tagata e toatasi, i se sala tupe e le silia le 1000 iunite tau faasalaga po o le nofosala i le falepuipui mo se vaitaimi e le silia le tasi (1) le tausaga, po o faasalaga uma e lua; po o

(ii) pe afai o le tagata o se kamupani, i se sala tupe e le silia le 5000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua.

VAEGA VI SOLITULAFONO

30. Faalavelaveina o Taaloga-(1) So o se tagata o ia lea ua ia faia so o se gaoioiga po o se mea ua le faia lea ua faalavelaveina ai le saogalemu ma le sologa lelei o Taaloga ua faia se solitulafono ma e tataua ona noatia i se moliaga ua faamaonia faaetulafono -

(i) pe afai o le tagata o se tagata e toatasi, i se sala tupe e le silia le 1000 iunite tau faasalaga po o le nofosala i le falepuipui mo se vaitaimi e le silia le tasi (1) le tausaga, po o faasalaga uma e lua; po o

(ii) pe afai o le tagata o se kamupani, i se sala tupe e le silia le 5000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o faasalaga uma e lua.

VAEGA VII AIAIGA ESEESE

31. Faaaogāina o tulaga aloaia faaletulafono i totonu ma fafo atu o Samoa - O le faia o se solitulafono e faasaga i lenei Tulafono e ala i le solia o so o se aiaiga o lenei Tulafono e tatau ona faatatauina o se solitulafono e ui lava e faapea o le gaoioiga, se mea ua le faia, gaoioiga faapisinisi po o mea ua mafua ai le solia o le tulafono e ono mafai ona tupu i fafo atu o Samoa.

32. Faoa faamalosi o meafaigaluega faasolitulafono-
(1) E ui lava i aiaiga o so o se tulafono, e mafai e se leoleo ma so o se tagata ofisa o le Pulega ua faatagaina e le Ofisa Sili o Pulega ona:

- (a) faoa faamalosi so o se pepa aloaia, ata pue, faamaumauga, faamaumauga faaeletoroni, ata tifaga po o isi meafaigaluega pe afai ua masalomia i luga i se mafuaaga tatau e faapea o ia meataitasi po o meafaigaluega sa faia po o o le a faaaogāina e solia ai se aiaiga o lenei Tulafono;
 - (b) faoa faamalosi so o se mea pueata, masini tau faamaumauga, komepiuta, se mea faaleotele leo po o isi meataitasi po o meafaigaluega pe afai ua masalomia i luga o se mafuaaga tatau e faapea o le meataitasi po o le meafaigaluega sa faaaogāina po o o le a faaaogā pe sa solia ai so o se aiaiga o lenei Tulafono.
- (2) O mea uma lava ua faoa faamalosi i lalo o lenei fuaiupu e tatau ona umia e le Komesina o Leoleo po o le Ofisa Sili o Pulega ina ia malupuipua ma e mafai ona faamatuu atu e tusa ai ma le faafuaiupu (3).

(3) O mea uma ua faoa faamalosi i lalo o lenei fuaiupu ia ua maua e se faamasinoga e faapea:

(a) sa faaaogāina, po o ua faamoemoe e faaaogā i le faia o se solitulafono i lalo o lenei Tulafono; po o

(b) sa faaaogāina, po o ua faamoemoe e faaaogā, faia po o le tuuina atu e solia ai so o se aiaiga o lenei Tulafono,

e tatau ona faamatuu atu i le Malo Tutoatasi o Samoa ma e mafai ona faamatuu atu i so o se faiga ua faamaonia e le Loia Sili.

(4) O mea uma ua faoa faamalosi i lalo o lenei fuaiupu ia e le faalēaogāina e tusa ai o le faafuaiupu (3) e tatau ona toe faafoi i le tagata lea sa faoa faamalosi mai ai le meataitasi.

33. Solitulafono a Faalapotopotoga-(1) Afai ua faia e se faalapotopotoga so o se solitulafono i lalo o lenei Tulafono, o tualumaga mo se solia faapena o le tulafono e mafai foi ona faia faasaga i so o se tagata, tagata ofisa po o tagata faigaluega a le faalapotopotoga ua tuufaatasia faaletulafono o ia lea i so o se auala, e ala i se gaoioiga po o se mea ua le faia, ua aofia ai i le faia o le solitulafono e le faalapotopotoga ua tuufaatasia faaletulafono i se faiga tuusao pe leai foi.

(2) Pe afai o se faasalaga ua faia e faasaga i so o se tagata, tagata ofisa po o le tagata faigaluega mo so o se solitulafono i lalo o lenei fuaiupu, e mafai e le faamasinoga ona faavasega le tagata solitulafono e faapei o se kamupani.

34. O isi gaoioiga ua solia ai lenei Tulafono-(1) E mafai e le Komiti Faatonu o Pulega ona faatagaina so o se tagata e ave ma sui o le Pulega e faia talosaga i se Faamasinoga e sailia ai se poloaiga a le Faamasinoga e taofia ai so o se solia po o le solia atili o se aiaiga o lenei Tulafono.

(2) I le faia o se poloaiga i lalo o le faafuaiupu (1), e mafai e le Faamasinoga ona faia so o se isi poloaiga po o poloaiga faaopoopo ia e manatu o ia e talafeagai e puipuia ai po o le faamalosia ai o aia tatau ua tuuina atu i le Pulega i lalo o lenei Tulafono.

(3) Afai ua mafatia le Pulega i so o se mea ua leiloa po o ua faaleagaina e mafua mai i le solia e so o se tagata o so o se aiaiga o lenei Tulafono, e mafai e le faamasinoga ona poloaia e faapea e toe totogi atu e le tagata i le Pulega so o se mea ua leiloa po o ua faaleagaina lea ua mafatia ai.

(4) E mafai e le Komiti Faatonu o Pulega ona faatagaina so o se tagata e avea ma sui o le Pulega ina ia talosaga i se faamasinoga mo se poloaiga e faapea o se tagata ua solia se aiaiga o lenei Tulafono e totogiina tupe mama ia ua faatupulaia i le tagata e mafua mai ona o le solia o lenei Tulafono.

35. Aiaiga tau soloaiga ma aiaiga faasaoina-(1) O faatagaga uma, laisene, konekarate, tualumaga faaletulafono ma moliaga ua faia e le Pulega i lalo o le Tulafono ua soloia e tatau ona faaauau pea ona faamalosia ma aloaia ma e tatau ona amanaia mo faamoemoega uma e faapei ai na tuuina atu, faia po o na tusia i lalo o lenei Tulafono.

(2) Mo faamoemoega uma faaletulafono, so o se faaiuga ua faia po o se gaoioiga ua faia e le Pulega i lalo o le tulafono ua soloia e tatau ona faatatauina e faapea ua faia po o ua faaogā e le Komiti Faatonu o Pulega e tusa ai ma lenei Tulafono.

(3) So o se gaoioiga ua faia pe sa faatagaina e le Taitaifono po o le Ofisa Sili o Pulega, a o lumanai ai le amata faamamaluina o lenei Tulafono lea e ogatasi ma so o se malosiaga po o le tuuina atu o malosiaga i lalo o lenei Tulafono, e tatau ona faatatauina e faapea ua faia aloaia e tusa ai ma nei tulafono e ui lava e le o i ai sea malosiaga po o le tuuina atu o malosiaga i lalo o le Tulafono ua soloia.

36. Faailoaina atu ma le faaogāina sese o faamatalaga-(1) E mafai e le Komiti Faatonu o Pulega ona fuafua po o le ioeina e faapea o so o se faamatalaga ua tuuina atu e po o le Pulega mo so o se faamoemoega e fesootai ma le faatinoina o lenei Tulafono e ao ona amanaia e avea ma faamatalaga faalilolilo, ma e mafai ona faatapulaa lona faaogāina po o le faailoaina atu o so o sea faamatalaga.

(2) So o se tagata o ia lea ua faailoa atu so o se faamatalaga faalilolilo e solia ai so o se faaiuga po o maliega lea e faasino i ai le faafuaiupu (1) ua faia se solitulafono ma e tatau ona noatia i se moliaga ua faamaonia faaetulafono i se sala tupe e le silia le 100 iunite tau faasalaga.

37. Tulafono faatonutonu-(1) E mafai e Le Ao o le Malo, i le faia i luga o le fautuaga a le Kapeneta, ona faia uma ia tulafono faatonutonu mai lea taimi i lea taimi e pei ona tatau ma talafeagai ai mo le faamamaluina atoatoa o aiaiga o lenei Tulafono.

(2) E aunoa ma le faatapulaaina o le tulaga lautele o le malosiaga ua tuuina atu i le faafuaiupu (1), e mafai ona faia tulafono faatonutonu e faasino i:

- (a) le tuuina atu o aia tatau faaopoopo a vaega o faasalalauga ma aia tatau i meatotino tau le atamai i le Pulega, po o le faamanino atu o so o se mataupu e faasino i aia tatau ua umia e le Pulega;
- (b) le uiga moni, tulaga e iloagofie ai ma le faaaogāina o Faailoga ma Faailoilo Tau Taaloga;
- (c) le pulega ma le faafoeina o so o se fale po o nofoaga a o faagasolo Taaloga po o le vaitaimi o lo sauniuni ai mo taaloga;
- (d) le pulega, faaaogāina ma le umia o fale ma nofoaga e umia e le Pulega i le maea ai o taaloga;
- (e) le faatauina atu o pepa e ulufale ai mo Taaloga ma so o se isi mataupu e fesootai ma faaaliga o Vaega o Taaloga;
- (f) le faatulagaga mo i latou e lagolagoina taaloga, maliega mo le lagolagoina o taaloga, sone o faasalalauga faatosina ma aia tatau e faia ai igoa;
- (g) le faatulagaga mo puipuigamalu, taualumaga ma manaoga ina ia mautinoa ai le saogalemu ma le malupuipua o le siosiomaga mo Taaloga;
- (h) so o se isi mataupu o le a fesoasoani i le pulea lelei ma le faafoega atoatoa o Taaloga; ma
- (i) faamalositia le tulaga gafatia o le Malo ina ia toe faaola mai tau ma sue ai tupe maua.

(3) O tulafono faatonutonu ua faia i lalo o leni fuaiupu e mafai ona faatonuina ai solitulafono ma faia ai faasalaga mo le solia o so o se tulafono faatonutonu i sala tupe e le silia le 100 iunite tau faasalaga po o le nofosala i le falepuipui mo se vaitaimi e le silia tasi (1) le tausaga, po o faasalaga uma e lua.

38. Soloia – Ua soloia nei le Tulafono o Pulega o Taaloga o le 2007 a le Pasefika i Saute 2002.

O le Tulafono o le Pulega o Taaloga a le Pasefika i Saute 2007 o lo o faafoeina e le Pulega o Taaloga a le Pasefika i Saute

**Lolomiina e le Failautusi a le Fono Aoaofaitulafono,
i le pule a le Fono Aoaofaitulafono.**